

Bon complean Maman! E rive la gnove stagjon, si fâs fieste pai 10 agns de trasmission

Cui 10 di Otubar, su Telefriuli e torne la trasmission tv par furlan
che la ARLeF e dediche ai fruts

E je daûr tacâ une gnove stagjon di Maman! e e sarâ pardabon speciâl. La trasmission televisive che e accompagne i fruts ae scuvierde de lenghe furlane e dal Friûl e distude 10 cjandelutis! E sarâ une stagjon plene di ligrie e di divertiment. La date di tignî iniments e je chê di **vinars ai 10 di Otubar aes 18.30**, cuant che Daria Miani, cul so inseparabil tui Vigji, e Desiree Chiappo Debegnach, la simpatiche “vicine di cjase”, a tornaran su Telefriuli pe gjonde di cetancj fruts. Fin al prossim mêis di Jugn, Maman! ur fasarâ compagne ogni vinars, simpri aes 18.30 e, in repliche, la domenie aes 7 e aes 13.

La trasmission televisive e je une coproduzion tra la ARLeF - Agenzie regionâl pe lenghe furlane e Telefriuli. Al è un program che, cul divertiment, la narazion e il zûc al espon i plui piçui al plurilinguism e ai tancj vantaçs cognitîfs e comunicatîfs che si àn cul doprâ plui lenghis fin di piçui.

Cun gjonde e ligrie, Daria e Desiree a regalaran ai piçui telespetatôrs aventuris speciâls, moments di zûc e tant intratigniment cun musiche, cartons animâts, e cu la leture di contis originâls e de tradizion. Il divertiment educatîf al è garantît di rubrichis di sucès tant che **"Fasin un zûc"**, che e cjape dentri i fruts cun cuesîts e induvinei e **"La cuisine Bete"**, che e à come protagoniste la estrose “cuisine” di Daria Miani (ven a stâi Daria stesse). Je e proponarâ piçui experiments, mini-laboratoris cun lavoruts simpatics e e contarâ ancje tantis curiositâts sul Friûl, ma ancje su altris Paîs dal mont, su lis lôr culturis e lis lôr lenghis.

Tra lis novitâts de decime stagjon al è in particolâr un gnûf carton animât che al plasarâ une vore ai fruts plui piçui: **"Spicût il riçut"**. Al conte lis aventuris e lis emozions di un riçut une vore dolç e dai siei amîs, puartant i fruts tal mont des besteutis dal bosc.

La trasmission Maman! e je metude adun di un grup di professioniscj di alt nivel: il responsabil de produzion al è William Cisilino, la regjie e je di Martina Beraldo, il program al è scrit di Francesca Battistutta, Daria Miani, Sabina Pituello e Eva Zucchiatti e la consulence linguistiche e je curade dal Sportel Regionâl pe Lenghe Furlane. Lis musichis originâls a son di Flaviano Miani e Daria Miani e la animazion de sigle e je di Tommaso Ravo. Al projet a colaborin Veronica De Giorgio, Giulia Della Mora e Gaia Riabiz.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Dutis lis pontadis de stagjon numar 10 di Maman! a saran disponibilis ancje te *tv on demand* di Telefriuli, tal canâl [YouTube](#) e tal sît de [ARLeF](#), là che si puedin za cjalâ lis 260 pontadis des stagjons passadis. Cun di plui, tal sît i fruts a podaran cjatâ tancj altris contignûts simpatics su Maman!

Udin, ai 6 di Otubar dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<